

Festivitads e sfidas

La Lia Rumantscha ha salvau sia radunonza da delegai a Glion

DA GIUSEP VENZIN / ANR

■ Igl onn proxim festivescha la Lia Rumantscha il tschienavel. Quei giubileum festivescha l'organisaziun tetgala dalla Romontschia digl'empre tochen ils 18 d'ost a Zuoz. Avon che far fiasta ston il president Johannes Flury ed il secretari general Martin Gabriel aunc trer si las mongias per ina soluziun en favur dallas medias romontschas. Suenter che la Somedia ha annunziat la primavera 2017 la fin da La Quotidiana hagi la confederaziun pretendiu ina strategia che muossi sinergias per las medias romontschas. Ina grupp da lavur formada dalla Lia seigi vegnida alla conclusiun d'avischnar l'an ad RTR e da collaborar ton el cuntegn sco ella coordinaziun. Quei scriva la Lia el program d'activitads pil 2019. La Lia Rumantscha gioghi ina rolla accumpignonta tochen che la nova strategia da medias mondi definitivamein en vigur el decuors dil 2019. Che la tscherca d'ina soluziun per las medias romontschas ei ina dira nuscha ha il cusseglier guvernativ Martin Jäger constatat. «Las medias romontschas vegnan aunc a restar ditg in plaz da construcziun.»



La radunonza da delegai dalla Lia Rumantscha ha giu liug la sonda a Glion. Il cusseglier guvernativ Martin Jäger ei staus presents. Cunque quella caschun ha el constatat: «Las medias romontschas vegnan aunc a restar ditg in plaz da construcziun.»

FOTO SURSELVA

In milliun per las festivitads

Per las festivitads da giubileum il 2019 ha la Lia Rumantscha in preventiv da 975'000 francs. Tier la fiasta da giubileum a Zuoz han liug ellas regiuns differentas occurrenz sco prolog. Il collaboratur Andreas Gabriel ei il menader da project. El center dallas festivitads a Zuoz stat la presentaziun dil teater «Tredischin, il lader fin». Ils auturs dil toc ein Rut Plouda e Tim Krohn, Manfred Ferrari meina la reschia ed Astrid Alexandre ei la dunna responsabla per la musica. Il

fevrer suonda il program da detagl. Sco il president Johannes Flury ha puntuat drovi la Lia tochen la fin da schaner 600'000 francs, autruisa stoppien ins cursanir il program. La festividat da giubileum dueigi dar ina vesta dalla Romontschia anoviars, mo era dar a persunas d'uter lungatgs ina vesta anen tenor il motto «co veseis vus la Romontschia».

Incumbensa da Berna

El rom dallas medias stoppi la Romontschia trer a nez las sinergias senza piar-

der la diversitad. Quei ha il secretari general Martin Gabriel derg tier la presentaziun digl'engaschi dalla Lia Rumantscha en favur d'ina soluziun per las medias romontschas. Che la tscherca d'ina soluziun che persuada tuts ei ina sfida ha il president Flury constatat ell'introducziun dalla tractanda. Leu ha el constatat ch'els Engiadines seigien d'in auter meini quei che pertucca ina gasetta surregionala dil di. Berna hagi era in auter meini davart ina gasetta dil di gra-

Il project «medias romontschas 2019» ha la finamira da segirar l'existenza dallas medias existentas a liunga vosta e da migliurar la collavuraziun denter las differentas medias romontschas. Per far quei duei la Fundaziun Medias Rumantschas daventar l'organisaziun successura dall'Agentura da novitads rumantscha. Tochen miez schaner 2019 stoppien aunc entginas damondas vegnir sclaridas per survegnir ils daners giavischai.

Culla soluziun avisada ei sulet il cuntegn per las medias romontschas garan-

tius. Ina gasetta stoppi era vegnir stampada e distribuida, ha Flury detg. El ei allura sedumandaus schebein ei detti aunc ina Somedia en tschun onns. «Avon diesch onns fust la risposta stada clara.» Il president dalla Lia Rumantscha ei dil meini ch'il concept da cooperaziun denter las medias stampadas ed electronicas savessi haver caracter da model per l'ulteriura Svizra.

Roman Pfister per Jon Carl Tall

Ils delegai han eligiu Johannes Flury per ina secunda perioda d'uffeci president dalla Lia Rumantscha. Quel ha allura fatg attent che quei seigi sia davosa perioda d'uffeci. Plinavon ha la radunonza eligiu Roman Pfister sco successur da Jon Carl Tall ella suprastanza dalla Lia. Pfister ei carschius si ella Foppa ed ei staus engaschus a Berna ed a Turig el survetsch d'informaziun strategic. Pfister ei actualmeins president dall'Uniun dallas Romontschas e dils Romontschs ella Bassa. La suprastanza secumpona plinavon da Gion Capeder, Donat Naye e Maria Sedláček.

Ina soluziun pragmatica

El plaid da beinvegni ha la presidenta dalla vischnaunca dad Ilanz/Glion numnau la soluziun davart il diever dils lungatgs romontsch e tudestg en sia vischnaunca ina soluziun pragmatica. «Ilanz/Glion ei buc ina vischnaunca bilingua, mobein ina vischnaunca cun dus territoris linguistics», ha Carmelia Maissen detg. Els affons el territori romontsch visetien la scola romontscha ed ils affons en territori tudestg la scola tudestga. Pil lungatg romontsch seigi la fusiun tier Ilanz/Glion d'avantag. «En las vischnauncas pintgas era il diever dil romontsch dependents dallas persunas. Savens vegneva la corispundenza menada en tudestg.»

Il spazi tranter ils pleds

Ils 28avels Dis da litteratura a Domat

■ (cp) Ils 28avels Dis da litteratura han il motto tranter lingias ed èn dals 2 fin ils 4 da november 2018 en la halla Tircal a Domat. Els sa deditgeschan al pled u meglier ditg al spazi tranter ils pleds. Tge è tranter (las) lingias? Tge capita en quest lieu? Igl è il spazi nua che l'autura e l'autur protegian la tensiun, la melodia, il messadi zuppà, forsa era critica e tabus. La litteratura viva da tals spazis. Els èn in segund plaun da comunicaziun. La lectura ed il lectur vegnan animads da reflectar, d'interpretar e d'udir trantertuns. Per exempel cun agid da metafras, allusius ed ironia. È l'essenza, la vaira muntada forsa be da chattar tranter lingias?

Il Premi Term Bel torna als Dis da litteratura 2018

Il venderdi vegn il festival lantschà cun cabaret poetic e politic. Il duo schön&gut cun Anna-Katharina Rickert e Ralf Schlatter preschenta ses nov program Mary. Ils purtaders dal «Schweizer Kleinkunstpreis 2017» fascineschan cun satira spiertusa e fantasia senza cunfins.

Silsuenter datti litteratura sin empustaziun: Era tar la segunda ediziun da la Shot-Story-Night pon ins retrair in'istorgia cunter in sitg. L'autura u l'autur vegn a la maisa, fa ina prelecziun exclusiva e suenter vegn fatg viva ensemen. I dat shots cun e senza alcohol.

La sonda stat surtut il Premi Term Bel en il center. Ils texts nominads vegnan prelegids da Marietta Jemmi e lura discussiunads d'ina giuria. La surdada dal premi è la dumengia suentermezdi.

En il Tavulin litterar discutan Martin Camenisch e Clà Riatsch davart novs cu-

deschs e prendan sut la marella era quai che stat scrit tranter las lingias.

La saira ha lieu ina gronda tschaina da gala Daletgs tranter lingias. Tranter las tratgas datti musica, cabaret e spectacul tranter artistas ed artists en cumbinaziuns sorprendentas. Cun: Seraina Sidler-Tall & Simon Benz, Flurin Caviezel & Sara-Bigna Janett, Astrid Alexandre & Rikika Läser ed il clown Roberto Chiriatti.

La dumengia sa ferma la turnea «Sin il viv!» per il giubileum da 25 onns da l'emissiun Impuls dal Radio Rumantsch per la 7avla ed ultima giada als Dis da litteratura. En il salun da coiffeur Haaratelier prelegian differentes auturs lur texts. Gianna Olinda Cadonau e Prisca Agustoni dattan in insatg da lur poesias ch'ellas fan tranter linguas. En il rom dal project Poethreesome dal festival da litteratura Babel han ellas translata vicendaivlamain lur ovras en differentas linguas.

Vernissaschas

Als Dis da litteratura datti era quest onn differentas vernissaschas, preschentaзиuns e prelecziuns. Benedetto Vigne prelegia or da ses primroman Ils ventganov da settember. In roman plain tensiun, magia e misteri che raquinta d'in um sin viadi precipità e dals turbigls d'in pubertat.

La victura dal Premi Term Bel 2016 Asa S. Hendry dat in insatg or da ses emprim cudesch Sin lautget. Ina giuvna ed in autur s'entaupan ed exploreschan lur cunfins en quell'amicizia nunusitada.

Prelecziuns

Rico Tambornino prelegia or da ses nov cudesch Il scutinem dallas olmas. En quel descriva l'autur in schabeg commo-

vent da l'onn 1847 ch'ha chaschunà l'ultim trauement da mort en il Grischun.

Martin Camenisch explitgescha il context istoric.



Era quest onn datti in tschuat da guardar e tedlar als 28avels Dis da litteratura a Domat.

MAD

Paula Casutt-Vincenz prelegia or da ses emprim roman L'umbriva dil temps/ Der Wandel der Zeit. La prelecziun vegn accumpagnada dal musicist Christoph Senn.

Il Grischun talian Giovanni Maranta vul far pli enconuscent la poetessa ladina Luisa Famos ed ha perquai translata sias poesias en talian. Ensemen cun Anina Sedláček prelegia el tinginas.

Preschentaзиuns

Olga Prevost-Bazzell preschenta ensemen cun Dumenic Andry intginas da sias istorias, reminiscenzas ed anecdotas ch'èn cumparidas en l'ediziun annuala da la UdG La Chasa Paterna.

Flavia Hobi e Benedetto Vigne preschentan La Litteratura 37: Meds e messadis, il nov numer da la revista annuala da la ULR. Hermina Sgier prelegia intgins insatgs ordlonder.

Rut Plouda prelegia ses text or da la revista Viceversa Litteratura 12, la revista che promova la litteratura en las quatter linguas nazionalas. L'ediziun da quest onn sa deditgescha al tema (Senza) vargugna.

David Flepp raquinta or dal cudesch La cigna. La paraula veglia sursilvana che Gabriela Holderegger Pajarola ha raquintada da nov.

Ultra da quai preschenta Mevina Puorger sia nova publicaziun da edition-mevinapuerger, quest onn: Scuvierta da l'orma – ina reediziun da quatter novelas da Selina Chözn.

Il program detaglià dals Dis da litteratura 2018 chattais vus en l'annexa ubain sin nossa pagina d'internet www.disdallitteratura.ch